

欽定剿平三省邪匪方畧

正編

七  
五



欽定剿平三省邪匪方畧正編卷一百六十五

庚申年

四月十一日癸巳魁倫勒保奏言查藍號等股匪

自過潼河裏脅愈衆連日分股亂竄屢據獲犯  
供稱亟欲與白號賊匪合夥同到成都川西壩  
焚掠臣等一面分兵扼住中江金堂等處進省

要路一面督同施縉等竭力兜剿匪衆不能西  
竄又復逞其狡詐伎倆或百餘人或數十人四

散放火以圖牽綴官兵其大夥賊匪卽亡命狂奔臣等於二十六七等日督兵分投追捕殲擒放火散賊數起並陸續投出被脅難民三千餘人訊知藍號青號線字號等股賊匪合爲一夥惟藍號分出數百人隨同白號南竄其餘仍由原路折竄躡淺過河再定去向臣等儘馬步兵丁之力卽連夜由景福院直趨太和鎮二十八

日已刻趕至該處探知前隊賊匪先於二十七  
日夜間陸續涉淺過河其後隊尙未過完當經  
阿哈保施縉薛大烈等率領現到馬步官兵直  
至河邊追殺其在中流淌水及未經過河者尙  
有一千餘人悉撲水奔逃淹斃大半我兵亦卽  
渡河窮追該匪等並不敢抵禦追殺三十餘里  
又斃賊三百餘人生擒王正富等一百三十五

名散出被脅男婦七百餘口訊悉各股賊匪  
於二十八日早間在黨家舖商量川西一帶現  
有白號一股在彼滋擾想官兵必不能追過河  
來盡可分股竄逸暫避官兵現在藍號線字號  
山西充南部一帶仍欲竄龍安黃號青號往蓬  
州一帶欲圖搶渡嘉陵江否亦卽同竄南部等  
供臣等正在分兵追剿接奉

諭旨飭令

臣

勒保不必再赴川西徑赴川北督辦賊

匪

臣

魁倫於川西賊匪辦竣後仍當駐紮潼川

一帶嚴密防守實力撫綏伏查刻下潼河東西

兩岸均有賊匪其在潼河以西者係白號並藍

號分出小股之賊已經德楞泰剿捕得手諒可

卽日蕩平今黃號等四股合爲一夥又復折竄

潼河以東勢雖窮蹙而人數尙衆亟須併力剿

辦且現據總兵百祥署龍安府黃爲霖等稟報

三月十七日有賊匪兩股由甘境竄入南坪要

由白馬路火溪溝前赴龍安而文縣另有一股

賊匪在楊土司地方滋擾距哈西墩甚近現在

一面督率兵勇堵剿一面飛稟叅贊那彥成派

兵進剿等情萬一此路賊匪又乘間竄入川西

更有關係是以再四商酌臣勒保卽帶阿哈保

所領索倫馬隊三百餘名施縉等所領先後調  
到黔兵六千名爲一路由西充南部保寧境內  
緊躡賊蹤盡力追剿臣魁倫卽帶原有兵勇及  
新到土兵共六千餘名爲一路由西充緊貼劍  
州梓潼邊界相機迎擊既可遏此股賊匪西竄  
之路並可防甘賊竄入川西就目下賊勢情形  
而論不得不權其緩急先將潼河東岸一帶現

有賊蹤殲戮淨盡再行遵

旨分兵赴陝臣勒保亦卽馳赴川北一帶剿辦再連

日打仗千總冉斌身受矛傷陣亡其餘間有傷

亡兵勇查明另行咨部至擒獲活賊內王正富

等五十七名從賊日久卽行正法其餘被脅難

民與陸續投出之男婦二千八百餘名口均給

予路費口糧令其回籍交地方官妥爲安插再

查川北境內各股賊匪疊據地方文武稟報鮮

大川一股由巴州之玉山場等處竄至儀隴之

蓋刹寺經該牧令親率勇練夾擊俱有斬獲賊

衆卽奔青龍坎三月十八日署巴州知州田文

煦把總陳安邦在白尖山地方截擊有軍功馬

鈐能鎗斃偽先鋒鮮大霞一名卽在該匪身上

搜出昭通鎮中營遊擊鈐記一顆又殲斃賊匪

八十三名生擒白映川等三名搶獲牛馬三十

七頭凡餘匪又向儀隴邊界竄逸其龍紹周唐

大信等兩股由陝西茨蓬溝竄入太平縣境攻

撲金錢林洞兩寨經該處署主簿張雲漢親督

團勇往援斃賊一百餘名並有龍紹周業經鎗

斃之說尙未查確餘匪已向該縣大竹河水窩

子一帶逸去又湯姓一股由新寧梁山竄入大

竹縣境該署令張位中於三月十五日親率兵勇至東嶽廟卽遇賊匪大隊竄來該令立時迎擊斃賊數十名並親自射死騎馬賊一名詎賊愈聚愈多張位中力竭陣亡外委王耀龍亦同時被害兵勇及跟隨張位中之家丁差役傷亡亦多臣等查張位中素爲辯省奸官今因禦賊陣亡殊堪憫惜相應請

旨優卹以慰忠魂至  
臣魁倫前大知會阿迪斯帶兵

一千五百名赴梁山一帶剿辦此股賊匪嗣接  
來咨知已先派一千名赴遂寧堵剿祇派遊擊  
夏雲龍帶兵五百名前赴梁山大竹一帶協剿  
實屬不敷適據渠縣稟報明興已帶滿兵就近  
前往堵截其楊秀一路打仗情形日來未據報  
到伏念川北境內賊股既多兵力又覺單薄  
臣

勒保自應遵

旨馳往剿辦惟潼河以東之賊正當追剿喫緊之際  
勢難歇手一俟日內痛剿一一仗如能悉數殲  
除固屬甚善否則當察看賊勢緩急再行分兵  
剿辦以免顧此失彼

魁倫又奏言查藍黃白等號匪衆自經德楞泰  
官兵剿敗情急於三月十八日夜間由太和鎮

上遊王家嘴地方躡淺渡河

臣

於十九日接據

稟報卽一面帶兵起程日來會同勒保併力追

剿該匪等又從原路折回

臣

在太和鎮親閱該

處情形緣近來久未得雨河水消涸而王家嘴

灘水更淺人馬均可淌渡

臣

先恐派防兵勇日

久懈弛屢次責成建昌道劉清督率稽查並飭

專防太和鎮之遊擊王之鑑都司睦隆安等會

同太和鎮通判連彭年嚴密防範又恐該處鄉  
團不足深恃復添兵四百名派令遊擊鄭啟貴  
於十六日前往協防詎該匪等在河東被剿情  
急十八日竟由太和鎮上游八里之王家嘴竄  
來有騎馬賊匪數百人涉淺先過直前攻撲防  
河卡隘查王家嘴一卡安放圍勇一百五十名  
係團頭文大魁管領當時不能抵禦團勇被賊

衝散餘匪亦卽接踵躡渡維時遊擊王之鑑會  
同該通判連彭年聞信卽率兵勇前往迎截奈  
衆寡不敵兵勇被賊傷斃數十人連彭年右腿  
猝中矛傷兵勇不能抵禦以致賊匪逕奔太和  
鎮放火燒房而該處爲水陸衝途商民船隻往  
來難以禁絕賊匪於十八日半夜到太和鎮時  
肆行焚殺商民靡不驚逃該匪等遂得搶船全

渡惟後隊未渡之賊經德撈泰督兵追殺淹斃甚多劉清係臣派在潼河以下專司督率兵勇

實力嚴防之員是夜雖在潼川一帶巡查沿河

營卡及至聞信趕來太和鎮業經失守而責有

攸歸斷難辭咎王家嘴地方係專派遊擊王之

鑑所管段落尤屬罪無可辭通判連彭年雖身

受矛傷但在本鎮地方被賊搶渡亦屬疎玩以

上三員其咎較重都司時陞安原派在太和鎮  
下遊十里之打鼓灘駐守緣灘上有凌雲寨居  
民二千餘戶五更時卽有賊匪三四千人攻撲  
該寨經該都司督率兵勇竭力保護斃賊二十  
餘名賊始退去遊擊鄭啟貴奉札帶兵四百名  
自金山驛前來於十九日行至射洪縣迤東之  
五郎碥卽遇賊匪由太和鎮欲趨射洪縣城正

在太平壩大河邊行走鄭啟貴卽督兵堵禦賊衆折退署縣符元魁防守縣城聞報馳至賊已由太和鎮向中江一路奔竄以上三員其咎稍次至臣防守不力業經奏請

聖明嚴加治罪所有現在查明疎防文武各員相應據實嚴叅請

旨將建昌道劉清遊擊王之鑑通判連彭年交部嚴

行治罪遊擊鄭啟貴都司睦隆安署射洪縣符  
元魁交部嚴加議處以示懲儆均奏入

上命軍機大臣傳諭勒保曰川西竄匪由太和鎮王

家嘴地方搶渡潼河後德楞泰已帶兵追及多有

斬獲自東而西勒保率同施縉由金山驛截擊自

西而東潼河南南尚有小河一道阻隔正望德楞

泰勒保等趁賊匪在兩河之間東西夾擊迅速殲

除乃賊匪仍出原路折竄躡淺過河竟任來往自  
如毫無阻攔實爲可恨魁倫前此縱賊竄過漳河  
後伊卽應於漳河一帶派委妥幹文武卒同兵勇  
認真堵禦以防賊匪折回一悞豈容再悞乃竟仍  
前懈玩全無防備使賊匪復由太和鎮竄回是不  
但再悞且三悞矣其時勒保尙未接受督篆皆魁  
倫疎縱所致是伊罪上加罪尙有何言分訴著勒

保將此一節併入魁倫罪案嚴行訊鞫按律定擬具奏仍遵前旨將魁倫解赴成都監禁候旨至由甘省竄至龍安及六縣另股賊匪均係那彥成剿敗之賊若再乘間竄入川西殊有關係魁倫原帶兵勇及新到土兵共計六千餘名由西充等處邊界相機兼顧甘省竄匪自應如此辦理但魁倫前已有旨革職拿問此一路帶兵乏人勒保將魁倫

拿問後自己派令妥員接手剿辦所有帶兵大員  
內何人得力朕亦無從懸擬勒保務須嚴飭此路  
帶兵之員一面遏賊西竄一面防堵甘匪闖入川  
西並著將派令何員卽行覆奏以慰懸念勒保此  
時惟當先辦川西竄匪俟川西賊匪剿盡後再行  
帶兵前往川北會剿所有殺賊陣亡之署大竹縣  
張位中及受傷陣亡之千總冉斌俱著咨部賜卹

又據魁倫另摺查叅道員劉清等分別治罪嚴議  
著交勒保再行查訊如魁倫所奏情形俱屬確實  
劉清係總巡之員賊匪在王家嘴渡河非伊專管  
地方且其平日官聲尙好勒保應遵照前旨將劉  
清革職留於軍營効力贖罪遊擊王之鑑係專派  
防河武職不能預爲防範及賊匪渡河時並未與  
賊打仗受傷其非親身迎擊可知獲罪甚重當予

以斬決通判連彭年於本管地方被賊搶渡與王  
之鑑厥罪維均係屬文貞尙知禦賊身受矛傷情  
節微有不同連彭年應行絞決勒保審明後如別  
無情節卽在該處分別辦理倘其中或尙有別情  
可原一線之處勒保於定罪之後不妨據實奏明  
候朕再降諭旨至遊擊鄭啟貴都司睦隆安署射  
洪縣符元魁俱照劉清之例一併革職留於軍營

勦力贖罪

上又命軍機大臣傳諭額勒登保那彥成曰前據那彥成奏將甘境大股賊匪痛加剿殺帶兵由甘入陝與額勒登保會剿陝境賊匪距今已踰旬日未據續有奏報本日據魁倫勒保奏川北境內現有鮮大川一股竄至儀隴地方又有龍紹周唐大信兩股竄入太平縣境又有湯姓一股竄入大竹縣

境此數股賊內鮮大川一股本與苟文明在陝省  
安康境內滋擾現復由巴州竄至儀隴其龍紹周  
唐大信兩股係由陝西茨蓬溝竄入太平縣境是  
川北賊匪股數尙多大半係由陝境竄入計此時  
額勒登保那彥成俱在陝境剿賊中隔老林或係  
得有勝仗將賊匪逼入川境或竟係老林藏匿之  
賊潛由小路竄出而額勒登保那彥成因有老林

間隔全不得信俱未可定川北地方現無大員堵剿或該處原設堡寨有被賊匪攻破以至紛紛四竄剿辦益難不可不急爲剿捕前曾有旨令德楞泰專辦川西之賊魁倫防守潼河勒保專辦川北之賊各路俱有大員督辦詎料魁倫防守不嚴川西賊匪竄過潼河已降伊革職拿問令勒保暫署川督與德楞泰分剿潼河以東之賊今據魁倫勒

保奏賊匪被剿緊急仍由太和鎮竄回潼河以東  
現係勒保在彼督辦而德楞泰尙在潼河以東剿  
辦分股竄匪均不能前赴川北額勒登保那彥成  
一係經畧一係叅贊川陝賊匪皆應合籌會剿如  
陝省現在得有勝仗此時川北各股卽係陝省竄  
敗之賊自應乘勝跟蹤追剿前經屢降諭旨無論  
何處賊匪均應在本處剿淨今賊匪旣由陝竄川

伊等已難辭咎若將賊匪趕出陝境卽置之不顧  
則獲罪更重矣若賊匪係由老林潛竄額勒登保  
那彥成尙未得信於接奉此旨後應公同商酌額  
勒登保係總統督辦之員仍留在陝境督剿那彥成  
卽酌帶兵力前赴川北剿辦儀隴太平大竹等股  
賊匪庶川北陝西皆有大員督辦可期迅速集事  
若伊二人必須在陝合剿亦當於鎮將大員中選

擇一二員派領帶兵速赴川北以資剿辦再川陝  
老林爲賊匪逋逃之藪向來賊匪一入老林官兵  
卽不復追趕自昨歲那彥成督兵赴陝後親身帶  
兵深入老林追逐數月殺賊不及二三百名惟據  
奏稱該處山徑險滑樹木深密以至兵力不能施  
展又任賊匪竄出迄無功效今春賊匪竄至甘境  
平地那彥成始能大加剿殺連獲勝仗可見賊匪

既入老林官兵長技卽無所施此時老林內竄聚之賊諒必不可少額勒登保那彥成更當熟籌妥辦總須將賊匪由老林竄出路徑先行派兵嚴密堵截一面分派鄉勇前入老林將賊匪轟出俟其覓路奔竄大兵卽奮力截擊方可收以逸待勞之效不可又如昨冬將官兵悉行帶入老林跋涉險峻徒勞無益也

十二日

甲午

吳熊光奏言查楚北前股賊匪經明

亮等帶兵追剿現在奔竄遠安一帶後股賊匪竄入均州地方因楚省官兵相隔遙遠數日以來四散焚掠攻撲並分股於均州之白浪及鄖縣之九里崗陡河等處窺伺江岸意圖偷渡均經豫省防江兵勇轟擊始行退避雖經明亮派兵七百餘名赴均州進剿尙未趕到刻下賊蹤

仍在鄭陽之對岸武陽堡一帶滋擾該處上游  
卽屬陡河口臣前已派駐防滿兵三百名駐紮

陡河口對岸防守並派員就近募勇互相策應

昨復撥開封練勇前往協防現在江水有長無

消似尚可相機固守月餘以來獲犯審訊並留

心詢訪此次賊匪四散分竄實緣川東川北地

方連年未經耕種無食可掠是以紛紛逸出又

上年賊竄楚境後係德楞泰帶兵到楚追剿其所帶吉林索倫馬兵及四川士兵最爲趨健賊匪聞風畏懼竄回川境今川省旣無食可掠而楚北官兵步卒居多遠不及索倫吉林之得力不但撲滅需時尙未必能驅逐出境且楚省江北棗隨一帶如夾河洲黃龍塢等處遺孽未消除久亦難保其無暗中勾結情事是現在楚北

情形又與上年迥異軍務移步換形  
臣不特不  
敢稍存大意日來並添團鄉勇千餘名分守江  
干將開封練勇騰出預備賊匪萬一拚命搶渡  
即可帶領迎擊而棗隨一帶知豫省兵勇源源  
前往亦可藉資彈壓至陝西賊匪現接鎮臣田  
永桐等採報已由洵陽竄往安康屬之松樹壩  
地方在鎮安西南距城二百四十里等語是此

二股賊匪已距豫邊漸遠但聞額勒登保現統  
大兵自西向東追剿恐該匪一經剿急鋌而走  
險折回東趨且湖北二竹與陝西漢南各州縣  
接壤近聞漢南守禦單弱設楚省賊匪向西奔  
竄仍難保其不從上游偷渡闌入陝境江北地  
方是西路防守亦不可稍懈臣卽札囑田永桐  
常林等督率官兵確探陝境賊匪趨向倍加慎

密巡防毋使一名闖入奏入

上命軍機大臣傳諭吳熊光曰楚北奔竄後股賊匪擾及均州地方四散焚掠並分股在均州之白浪及鄖陽之九里崗陡河等處窺伺江岸吳熊光所奏各情節與昨日松筠奏報相同此股竄匪因川省無食可掠乘間奔突意圖偷渡均經豫省防江兵勇擊退所辦尚好並據奏稱江水現在有長無

消尙可相機固守覽奏稍慰但賊匪在江岸往來  
遊奕逼近豫境雖時交夏令江水日就漲盛一切  
防堵事宜尤當倍加嚴密卽如魁倫防守潼河非  
不三令五申督率堵禦而該處文武員弁等仍致  
疎防任賊搶渡可見賊蹤所到雖有江河阻隔亦  
難盡恃吳熊光自授任巡撫以來在豫省邊界堵  
賊無人不以爲辦理認真該撫現在江干團練鄉

男千餘名分段佈置自斷不因江水長發稍有大  
意而所派員弁等或以漢江可恃難保不意存懈  
怠或商賈貪圖微利不將船隻收泊或賊匪繁筏  
拚命搶渡萬一稍有疎虞關係匪輕吳熊光不可  
不隨處實力督察慎之又慎以期保護無虞毋過  
信屬員捏稟此爲最要

十三日 乙未 台布奏言 臣 接據洵陽縣稟報賊匪

直趨城下勢甚危急當查總兵柯藩劉之仁等  
俱在鎮安一帶堵截楊開甲等股相距稍遠飛  
飭臬司溫承惠帶領鄉勇就近星往救援該司  
於二十三日派令義首千總王英帶勇由漢江  
南岸陸路前進溫承惠由水路順流東下行至  
安康遇見逃難男婦訊知安康被擾迅卽馳往  
南岸催齊鄉勇派縣丞林延昌挑帶礮手沿南

岸轟擊王英帶領大隊渡過北岸迎頭攔剿賊匪折房紮筏正在搶渡南岸林延昌督率各勇乘其半渡奮力轟擊斃賊四十餘人北岸千總

王英候補把總吳大章冉貴劉明周武生馬殿

元千總銜黃傑奮勇當先鎗礮齊發斃賊一百

餘名生擒何德等二十四名投出城裏安康洵

陽難民男婦四百餘名口隨將獲犯審訊正法

難民分別貲送省釋該司仍帶大隊連夜馳赴  
洵陽二十五日由閭沙口渡過北岸分派林廷  
昌及把總吳大章劉明周冉貴武生馬殿元等  
由劉店鋪捷逕翻山該司由松木溝大路前進  
林延昌等趕至黃爐嶺見賊匪屯聚城下焚燒  
房屋並於西監立長梯點燃引火硝磺等物亂  
拋城內時風勢正猛城內房屋延燒民情慌亂

正在危急之際林延昌吳大章等趕到帶領義  
勇先將長梯擊倒鎗斃放火賊匪三十餘名賊  
衆回身抗拒復殲斃二十餘名該司踵至帶領  
王英等大隊鄉勇從東面連用鎗礮轟擊斃賊  
六十餘名內有騎馬執旗賊目三名賊衆見兩  
面有兵紛紛翻山四散有滾崖跌斃者救出本  
地難民一百六十餘人時已昏黑該司即令紮

住趕緊撲滅城內火勢飭令洵陽縣知縣薩玉

衡動撥倉糧八十石給散守城上民兵勇難民

男婦老幼好言撫慰人心大定臣查安康洵陽

兩處滋擾賊匪卽係五家營及楊開甲分股冀

圖牽綴官兵今經鄉勇奮擊仍復打回合夥不

出鎮安五郎南山迴圍之內辦理較易得手所

有在事出力之候補縣丞林延昌候補把總吳

大章劉明周冉貴武生馬殿元可否量予鼓勵  
之處出自

皇上天恩

台布又奏言查截留用餉一百七十萬兩內

臣

經手二十萬兩業經四數解還又督臣長麟截

留六十萬兩係因大兵入甘解至甘省應用統

計陝省臣未經接辦糧餉之時前督臣松筠兩

次截過九十五萬五千七百兩零自應趕緊清  
還俾資接濟惟查前項仰蒙

聖恩賞撥晉省銀五十萬兩現尙未到而經畧額勒

登保叅贊那彥成先後來陝臣前奏發銀二百

萬兩足敷三四月之用其時經畧叅贊兩大營

糧餉尙未併計在內此時各股竄匪盡入南山

實係極好機會則餉銀畢竟陝省爲重仰懇

天恩俯准將松筠所截九十五萬五千七百二十五

兩零六分歸入陝省軍需項下核實報銷以省

案牘而斷葛藤再查南山內五家營賊匪及冉

學勝小股因郿西鄉勇幫同陝省官兵堵截未

能竄出均在鎮安一帶游奕恒瑞柯藩業已帶

兵前往茅坪迎擊楊開甲等一股亦有劉之仁

等帶兵堵禦自甘折回戴家營張士龍等股從

太白河獅子嶺東竄現在額勒登保緊追蹤剿

適叅贊那彥成以甘省業經肅清帶兵來漢與

臣

面商由城固洋縣石泉抄赴東面兜擊統計

各股賊匪倏分倏合爲數雖多官兵聲勢壯盛

不拘何路日內總可得有勝仗惟需用糧餉較

前加增米麵等項急須趕緊採買陝省本非產

米之區加以用兵五年供支不少前於三月下

旬雨澤稍稀麥苗未能暢發漢中興安兩府市  
價驟昂臣惟有多方設法妥爲儲備以期無誤  
軍行亦不致有妨民食又查陝省興安府向有  
兩城新城專駐陝安鎮營兵現在堅固舊城專  
駐文員倉庫監獄皆在其內年久傾圯現任知  
府周光裕於嘉慶三年到任後因賊匪屢次滋  
擾倡議捐修臣於上年九月到陝據該府稟悉

前由當飭切實查驗并令將該義首等捐資姓名工費若干一併勒石茲據該府具報竣工崇墉保障一律整齊洵爲地方義舉除義首人等臣已酌加賞資外其捐資最多之張行簡一名可否仰懇

天恩賞給八品頂戴以示獎勵至知府周光裕於五家營賊匪竄近柳林子時帶領壯勇一千名幫

同副將劉成德等打仗斃賊三千餘名現又捐

銀四千八百兩倡修城垣情切報効應否一併

酌量

加恩之處出自

聖主洪慈

同日國霖奏言臣前在商州因接台布來信以

鎮安僅有總兵劉之仁一人帶兵駐守囑臣移

駐鎮安以壯聲勢嗣緣總兵柯藩帶兵前抵鎮安將軍恒瑞亦帶兵踵至並有富成亦赴鎮安之信是該處現有進剿之兵臣自當遵

旨回赴商雒一帶扼要防堵十九日自鎮安起程途次查有逃出被裹難民李甲元據稱賊匪前次奔赴南路因鄖西鄉勇人衆未能逸出今分數股欲向東面奔竄又因商州一帶旣有大兵並

有鄉勇是以心怯遲疑等語伏思賊匪時分時

合詭計多端

臣

現抵商州擬駐於適中之地帶

兵千餘名如賊匪一有東竄之勢卽當拒其要

路奮力迎擊均奏入

上諭內閣曰此次賊匪竄入安康洵陽地方兵勇併力攻剿連獲勝仗其在事出力之文武員弁自應分別加恩所有候補縣丞林延昌著留於陝省以

應陞之缺陞用候補把總吳大章劉明周冉貴武  
生馬殿元併著一體賞戴藍翎至臬司溫承惠帶  
領千總王英等大隊鄉勇殲賊多名並救出本地  
難民一百六十餘名卽動撥倉糧散給俾人心早  
就寧貼所辦亦好溫承惠著交部議敘千總王英  
在軍營素爲出力亦著以應陞之缺陞用其倡議  
捐修興安府城垣之知府周光裕著交部議敘捐

貲最多之義首張行簡著賞給八品頂戴以示獎勵

上命軍機大臣傳諭長麟台布曰此次賊匪逼近洵陽經台布飛飭溫承惠派令將弁帶領鄉勇就近赴援先後殲獲賊匪一百數十名投出難民五百餘人所辦尙好至陝省防堵事宜自當加意嚴密據稱各股賊匪此時盡竄入南山實係極好機會

此四字軍營奏報往往用之而日久尙未能竣事  
覽之生厭賊匪奔竄無常南山一帶邊界時出時  
入果能於各處卡隘嚴密防守使賊匪後有追兵  
前有攔截不難一鼓殲擒何以數年以來賊匪往  
來奔竄總未見剿淨一股昨據松筠奏到湖北鄖  
西一帶有賊匪闌入鄖西地界與潤陽相距不遠  
自卽係該處賊匪竄往又據勒保等奏川北地方

有龍紹周唐大信鮮大川等股亦由陝省竄入太  
平儀隴縣境或係南山老林藏匿之賊前由小路

竄往以致川北賊匪股數又多台布係本省巡撫  
防守是其專責惟當俟賊匪竄聚南山之時於卡  
隘認真堵截勿令再有竄逸俾帶兵大員得以乘  
機進剿長麟台布如不能認真堵禦致有疎縱則  
景安魁倫卽前車之鑒又陝省餉項前據台布奏

請時當卽降旨撥給五十萬兩嗣又撥給四十萬  
兩已敷兩月之用茲據請將松筠所截川餉九十  
五萬五千兩零歸入陝省軍需項下報銷以省案  
牘自應如此辦理但該省前後截留川餉至一百  
數十萬兩其中恐不無浮冒之處長麟台布尤當  
隨時稽查實用實銷不可聽信屬員致滋冒濫  
上又命軍機大臣傳諭額勒登保那彥成曰陝境各

股賊匪現尙不致騁張但昨據魁倫等奏由陝竄入川北各股賊匪甚多而鄖西地方亦據倭什布等奏有賊匪闌入自因陝境之賊被剿緊急其在南山屯聚者就近竄往川北而洵陽鎮安一帶賊匪就近竄往鄖西並未見額勒登保那彥成在陝西境內剿淨一股伊等節次具奏軍營打仗及殺賊數目自俱係實情斷不致以無爲有以少報多

但額勒登保那彥成在甘省時斬獲雖多而額勒  
登保剿敗之賊仍由畧陽逃至陝境那彥成剿敗  
餘匪亦由白水江闌入龍安皆不能全股辦竣竟  
如未曾接仗以致東奔西竄迄無了期此等教匪  
俱係內地奸民非如外域可比但征討外域我兵  
殺伊一人伊部落卽少一人若賊匪到處裏脅原  
無一定數目如官兵今日殺賊百人賊匪逃往他

處明日裹脅百人或千人俱未可定而我兵祇有  
此數遇有傷亡員弁卽少一人是賊匪雖日殺而  
不見少我兵卽日增而不見多何時始能竣事耶  
自剿辦教匪以來已及五年朕親政後籌辦軍務  
亦一載有餘而賊匪尙未辦竣試思我

皇考平定新疆拓地二萬餘里然用兵不過五年遂將  
從古未入版圖之地悉行戡定至今寧謐朕之運

籌謀畧實遠不逮

皇考時深兢惕至從前大臣克奏虜功榮膺爵賞人才輩出今額勒登保那彥成均係滿洲大臣辦此內地亂民豈不思迅速成功甘讓前人專美獨不愧於心乎倘因循玩誤日復一日必至罷斥治罪更復成何事體現在防堵之事已責成各督撫認真辦理額勒登保那彥成一係經畧一係叅贊務當

通盤籌畫胸有把握預料賊匪欲竄何處或先期  
派兵埋伏或親身前往迎截使賊匪不能出其範  
圍庶可以次殄滅若算計皆落賊後僅以跟蹤追  
剿爲事則賊匪輾轉奔逃焉能制其死命況各省  
境壤毗連在地方文武已不能稍存畛域之見若  
經畧叅贊則數省軍務皆應妥籌全局悉心佈置  
豈有將賊匪驅逐由此之彼卽云辦賊若在陝言

陝則竟成陝省之經畧叅贊矣前因川北地方空虛無人辦賊已降旨令那彥成在彼剿捕此時陝省賊勢就衰那彥成竟當遵照前旨酌帶官兵速赴川北其陝境之賊專交額勒登保督辦彼此熟商或剿或堵務須籌畫萬全總期閏四月以前一律辦竣毋得再有遲延致干咎戾至國霖奏稱帶兵移駐商州恐係擇一無賊處爲宿延之計並著

額勒登保察看國霖駐兵處所若離賊甚遠竟當  
調令隨營剿賊卽打仗未能得力其所帶兵丁千  
餘豈可置之無用之地卽著查明覆奏

欽定剿平三省邪匪方畧正編卷一百六十六

庚申

四月十四日

丙午

勒登保奏言

臣

接據探報知

賊匪由太白河奔苦竹街白營等處有出兩河  
口之信該處北通斜峪關可出郿縣西北通虢  
縣可出寶雞漸近平原其勢更易散漫是以

臣

覓道由銀母寺進口關一帶前往抄截行至石  
溝門知賊已自西河口方柴關竄出

臣於是夜

三鼓發兵從朱溝梁關山子地方截斷赴寶雞  
郿縣路徑該匪等聞有官兵抄向小關子大關  
子走分水嶺遁往老林臣帶兵追至分水嶺已  
及午刻該處嶺勢陡險馬匹只可牽曳而行遂  
令楊遇春穆克登布等揀挑奮勇步兵五六百  
名攀援拾上該匪等列旗數桿膽敢在嶺放鎗  
擲石我兵盤折而避而前隨後岱森保格布舍

帶領馬步官兵繼進甫及嶺巔該匪等不能據  
禦卽越嶺而竄下至坡底卽係深溝兩面石峽  
深林密箐官兵隨進隨剿殺賊計七十餘人而  
路徑逼仄懸崖大坡亂石層疊水勢亦極湧猛  
賊之跌斃淹死者不可悉數官兵直前追殺約  
有八十餘里又斃賊二百餘名天色已晚且行  
走一百五十餘里人力已竭官兵卽暫於魯家

巖露處將先後拏獲張崇賢等三十餘名遂加

訊問內李盤植一犯係張世龍旗首據供此股

賊匪張世龍與戴家營合夥共四千餘人戴家

營知有一戴四掌櫃實在不知其名伊等商量

往郿縣西安一帶擄掠如官兵追緊轉向藍田

再入老林今日張世龍派有元帥何姓在後率

領矛子手抗拒官兵他在嶺上見官兵人多先

自跑走我因腿上帶有鎗傷落後被拏路上看  
見何姓已被官兵截死等語當將該犯縛割張  
崇賢等十二名從賊已久並卽正法其餘劉紹  
成等沿途被脅之人槩行釋放初二三四等日  
仍卽率兵緊剿因山大路險兵力不能施展每  
日所殺或三四十人四五十人不等沿途投出  
共有一二百餘人多係留壩畧陽等處被擄乘空

逃出并稱該匪數日喫驥馬肉不過剩有二三十人餘人臣察其所言甚實當卽給票酌予盤費令各歸原處初四日晚師至華陽始出老山此次官兵擊賊雖無傷損而跌斃牲口亦復不少數日間糧米不能接濟幸華陽地方台布預行撥兵護解糧石已到藉以給散口糧兼查鍋帳兵丁多半未會趕到不得不暫行駐劄畧加整頓

所有殘敗餘匪向茅坪一帶奔逃五郎一帶尚有別股賊匪看來有前往合夥竄入深山之勢伏思目下陝中賊匪別無他技情急則逃竄老山終南秦嶺在在險阻官兵屢受牽綴糧運亦萬難運供况賊股尙多東遁西逃我兵直前追剿又慮或被衝突然亦不能稍事遲延總須堵者自堵剿者自剿堵者逐層圍逼剿者隨處尾

跟方可杜其蔓延痛行殲洗今

臣

隨處察看地

勢查明陝中所有兵力或堵或剿酌量分派並

親率所帶之兵遇賊先行趕剿計那彥成卽日

當蒞陝境再行妥商辦理再本日接據陝西按

察使溫承惠稟報該司帶領鄉勇至安康神灘

河據逃難民人報稱有賊匪數千人竄至江岸

距郡城僅三十里該司派令隨營縣丞林延昌

並督率千總王英等分投帶領鄉勇攔剿至二  
郎舖正遇賊匪紮筏搶渡經該勇等鎗礮轟擊  
先後斃賊一百數十名內有執旗賊目一人生  
擒數十名投出被裹男婦四百餘人賊匪紛紛  
敗退翻過錢家山向東北周家溝敗竄現因洵  
陽麻坪河三岔河等處均有賊匪屯聚該司仍  
卽帶領鄉勇馳赴洵陽剿辦等語並據該司將

節次打仗奮勇之文武鄉勇開單保薦可否予  
以鼓勵之處出自

聖主天恩奏入

上命軍機大臣傳諭額勒登保那彥成曰據奏官兵  
在分水嶺地方隨剿隨進追殺八十餘里斃賊二  
百七十餘名且自三更發兵行走一百五十餘里  
攀援直上踰越溝嶺並因天晚力乏暫於魯家岩

露處官兵似此備極勞苦將領等亦不避艱險實爲可憫但辦理總不得要領徒勞何益卽如此次追剿賊匪官兵由朱溝梁一帶進發遏賊前竄西北之路而賊匪又折向分水嶺遁往老林雖經官兵躡蹤追殺但訊據獲犯有賊匪張世龍等商量如官兵追緊轉向藍田再入老林之供迨額勒登保等於初四日追至華陽始出老山又因糧米不

能接濟暫行駐劄敗殘餘匪復向茅坪一帶奔逃  
而五郎一帶尚有別股賊匪並有合夥竄入深山  
之勢是額勒登保雖竭力剿辦而賊仍得依恃老  
林任意出沒額勒登保係屬經畧由甘入陝爲軍  
中第一大帥各營標知其追擊之賊僅係一股無  
名之殘敗匪徒動爲牽掣如此勞苦不能立就殲  
除其各股著名賊匪又將如何辦理陝省南山一

帶雖老林最爲深阻但亦必有出入路徑堵賊之  
法不外杜其竄入竄出二端如果能扼住要隘設  
法堵禦或將道路挖斷或擇要派令團勇嚴防賊  
匪烏能出入自如假如遇賊匪竄入老林官兵自  
不可在老林外閒駐與賊相持卽當妥爲布置堵  
其出路或另派兵勇將賊匪轟出賊匪在內無可  
掠食亦必向外奔竄即可乘機追擊倘賊匪業已

竄出老林卽當堵其入路不使復行竄往官兵乘  
其竄至平地之時四面兜截亦可痛加剿殺總應  
使賊匪旣入不得復出旣出不得復入庶可收搏  
擊之效乃各路帶兵大員每於賊匪竄至平地則  
以散漫難辦爲言而於深山密箐則又稱險峻逼  
窄難以施展似此動形窒碍藉口因循又安得有  
旣不漫散復不險窄處所待伊等從容辦賊耶至

該處老林內究有賊匪若干雖不能得其確數其  
大槩賊股數目自不難約畧而計著額勒登保接  
奉此旨後將老林內賊匪竄出若干現存約有若  
干通行核計籌辦至所稱堵者自堵剿者自剿堵  
者務須逐層圍逼等語實爲最要其防堵事宜已  
節經降旨責成該督撫等實力防範如接奉此旨  
後老林內已無藏匿之賊卽當嚴飭各路兵勇於

要隘處所截其再入老林之路若賊仍在老林內  
奔竄亦嚴飭兵勇截其竄出之路如有防範不力  
者著卽據實嚴叅治罪照川省疎縱賊匪竄過嘉  
陵江潼河之例辦理軍令務在嚴明額勒登保前  
此辦理一切不無過寬卽如吉蘭泰前在白水江  
一帶防堵任聽楊開甲照匪由虞關闖入甘境其  
罪甚重額勒登保僅請將吉蘭泰拔去花翎仍留

遊擊銜休致回旗夫尋常無事地方官員年老多病而於公務並無貽悞自可予以休致俾得頂戴榮身若疎縱賊匪玩視軍務亦照常請令休致則軍營人員無所儆畏豈能用命此卽額勒登保辦理姑息之一端嗣後當以爲戒如有防堵不力之員或令賊匪由老林竄出平地或任賊匪由平地竄入老林俱當查明此股賊匪係由何路疎縱卽

將該一路疎防之員一面奏聞一面卽行鎖拏定擬具奏再此次勦辦教匪已閱四年之久從前帶兵大員因循觀望並不與賊打仗固無足論卽如德楞泰明亮等從前奏報打仗殺賊亦係賊至方與接仗從未先向有賊處所截剿又虛報首級捏開賊數而所殺者又係附從裏胥之人以致蔓延日久此實軍營歷來通弊自朕親政後大加整飭

帶兵官員等皆知認真打仗而殺賊數目亦不致如前虛報邀功但年餘以來節次具奏所殺賊數或數千至數百名不等是賊勢早當殘蹙而各股竄匪仍往往來奔突剽辦迄無成效朕細思其故總緣賊匪長技在於到處裏脅擇其精壯平日安居飽食者迫之隨行所掠騾馬亦係民人自行喂飼休息脹壯者官兵則往來追剿人疲馬乏勞逸

相殊賊匪隨處可以掠食不必攜帶口糧一遇敗逃鋌而走險當此炎熱之時卽赤身露體皆可乘閒竄逸其奔走自爲輕捷而官兵則執持軍械攜帶火藥等物已屬累重且軍行餉隨必須糧運接濟方可充腹間遇軍糧到遲卽須停待以之躡蹤追擊自常處於不及之勢似此彼逸我勞反客爲主處處總落賊後焉能得力勦賊之法全在聲勢

聯絡預爲布置使賊無從奔逸然後合力攻勦始能迅速集事若惟事東馳西逐跟蹤追擊則官兵甫向前追及而賊又已遠去豈能一鼓成擒現在如德楞泰與勒保同在川西彼此信息不通何由併力協剿此卽聲勢不相聯絡之明驗今特再行明白宣諭此時總當謀定而戰轉不必因飭催緊急專事跟追賊匪數百人卽奏報一次以圖敷衍

塞責惟當酌度機宜通盤籌畫如剿辦一股賊匪先應確探賊情熟籌形勢將賊匪可以奔竄之處預行派兵設法堵截互爲聲援斷其去路然後大兵近逼悉力奮擊使賊所到之處皆有官兵攔擋辦此一股卽將此一股悉數殲除勿留餘孽庶可以次殄平額勒登保久厯戎行操守清廉懋著公忠那彥成係軍機大臣自到軍營已逾半載於剿

賊情形亦應熟悉悉且居心公正清漢文皆所通曉  
伊二人一任經畧一任叅贊剿賊事宜皆其專責  
尤當悉心籌畫胸有成竹轉不妨詳慎再四卽停  
待數日布置周妥再行決戰似稍遲緩而辦此一  
股卽將此一股剿淨機宜轉爲捷速總須處處圖  
占先著不落賊人之後則可預操勝勢昨經有旨  
令那彥成前赴川北與額勒登保雖分兩地但必

將堵剿大局彼此會籌聯爲一氣我兵以全力辦  
賊而賊匪無由奔逸復行裏脅賊勢自必日減而  
大功可期速竣矣

臣等謹案行軍之道必在出奇制勝始能所  
向克捷此次教匪滋事本屬烏合之衆惟恃  
山林險阻以奔走爲長技每遇官兵輒四散  
竄逃所過地方恣意焚掠閭里愚民室廬既

經蕩析兇鋒在前勢不能不被其驅迫一經  
裹脅口聚日多是以官兵雖極驁勇疊有俘  
斬而欲芟夷蘊崇絕其本根較之用兵外域  
尤難奏功剿辦稽延未必不由於此我

皇上洞悉貽鈐

睿謨廣運於賊情之詭譎軍行之遲速一切機宜

炳燭無遺

特頒訓示勉以詳慎謀定後戰務令處處圖占先著  
仰見

廟畧之閟深實有預操勝算者矣

上諭內閣曰據額勒登保奏稱溫承惠將節次打仗

奮勇之文武鄉勇開單保薦所有單內開列各員

除業經加恩外把總傅嘉外委李鳳鳴並著賞戴

藍翎千總王英已加恩以應陞之缺陞用并著先

換頂戴又于總陳表亦著以守備陞用先換頂戴  
署平利縣知縣任奎光著卽以知縣先行陞補

十五日丁酉德楞泰奏言逆匪張子聰等股前經

臣於新店子痛剿後日夜狂奔總在一百二三

十里以外該處素稱完善逆匪突如其來居民  
躲避不及被賈實多臣輕騎緊跟不予以暇沿

途被脅難民渙散者亦復絡繹於道百姓自行

報出者不問焚殺與否一槩給以銀米路票釋

放此時真賊無幾其勢迥非前時可比二月三

十日

官

兵抵樂至縣之寶林場賊已起營留後

馬賊約五六百人當被吉林索倫馬隊追至卷

硐橋殺賊一百二十餘名生擒許萬文等八十

四名分別辦理四月初一日官兵由中江縣屬懶

板欒前進初六日抵茶店子哨探賊匪屯於破

石岡一帶查該處東北可通葫蘆溪係潼河岸

邊其西南可通黃鹿鎮豐谷井又可出金山驛

大路必須繞出賊前方可截剿是夜三更五帶

兵卽由茶店子取道中江縣初三日辰刻我兵

趕抵黃鹿鎮迎住賊頭正值賊衆自破石岡痘

疹觀一路而來一見官兵卽佔山包抗拒當令

賽沖阿溫春阿穆勒塔李紹祖等帶領滿漢屯

土兵勇分左右兩路而進

臣督率侍衛達勒精

阿阿那保副將馬瑜倭星額叅將達自祥等由

中路而進馬賊千餘人步賊三四千人膽敢於

黃鹿鎮山梁亦分三路憑高下壓衝突我軍官

兵分力仰攻往來數次鎗擊箭射立斃馬賊十

數名步賊二百餘名賊始敗走我兵乘勝競進

搶上山梁壓下澗溝又殺賊五百餘人因田塍

路仄賊敗擁擠滾跌堰塘內淹死者亦有二百  
餘名生擒胡洪林李思蓮等六百八十三名口  
又有臨陣投出難民蔣曰星李徐氏等五百三  
十一名口其逃散者亦復不少餘匪分路鼠竄  
一由羅漢場雷打石三元橋而逃臣令溫春阿  
穆勒塔李紹祖等帶馬步兵勇追剿至朱家坪  
一帶圍住殺賊四百餘名生擒王文元劉李氏

等二百五十六名口跳下堰塘淹死者約有四

五百人一由傅家河高屋基豐谷井一帶奔逃

臣

督率賽沖阿達勒精阿富汗僧德色爾滾穆騰

額馬瑜蒲尙佐等疾追沿途殺賊二百餘名趕

至河邊前隊之賊業已淌渡尙餘賊匪二千餘

人我兵剿殺四百餘名追入河心急流中淹斃

者又七八百名生擒李邦泰等二百七十八名

河岸復有投首難民段金榜夏陳氏等一百十  
四名口呈繳首級內據獲犯王茂得等認出僞

總兵張長生探馬頭王先等二名小頭目旗首

李貴等五名搶獲繳位鎗矛旗幟馬騾牛隻甚

多其投出難民蔣日星等並訊出難民陳大勇

李林氏等八百一十三名口一槩照例釋回其

有日久匪犯胡洪林王文元等四百八十八名

一併正法該逆現由觀音寺開封廟原路東竄  
又查藍號賊匪經魁倫勒保追剿已至南部天  
山場一帶白號餘匪勢必與之合夥臣尾躡前

進如能卽日剿除固善否則賊合而官兵亦合

既可兩面夾攻又可會商分路兜截再得痛剿

數仗則掃除自易得手

德楞泰又奏言查前後所調黔兵六千名俱已

到齊經魁倫勒保帶領造勦藍號等逆現至劍

州之元山場一帶與臣相距甚近一兩日即可

會合將川省情形通盤籌計或臣接辦藍號等

逆卽遵

旨令勒保帶兵徑赴川北達州東太一帶顧及邊界

竄匪頃又接到額勒登保並那彥成咨來奏稿

知已帶兵先後入陝其甘省現只高一馬五餘

匪不及千人由卡狼寨敗向南竄即可折回川  
境之龍安那彥成已飭該處駐守之總兵百祥  
就近迎截又經魁倫勒保派令署總兵託雲泰  
帶兵協勦臣復行札飭託雲泰等如果賊匪入  
川務當趁其窮蹙會同百祥勦淨須顧及川西  
爲要惟查各處賊股散漫無定當此勦辦喫緊  
之隙兵力愈多勦辦愈易至阿迪斯玩悞擁兵

之處業已遵

旨行催令其卽速來營其原領兵丁卽令就近暫行  
移交總兵許文謨管帶俟其抵營再行會同勒  
保查訊辦理又查總兵德英額前經額勒登保  
因巫山界嶺並黃羅傘一帶爲川楚總要門戶  
派令帶兵在彼防守所帶兵力分布卡隘本屬  
單弱堵禦尚可支持勦賊勢難進取然竄匪時

來窺伺亦尚不敢徑行搶越且該鎮前在苗疆

臣

素知其打仗尙屬勇往現在該處雖無賊匪

未便遽行撤出如果有避賊株守情事斷不肯

稍存瞻徇又逆首徐添德爲川省起事要犯極

爲詭譎兇悍

臣

現剿之賊只有該逆之徒汪瀛

在內又據獲冉添元等僉供內有徐元帥係黃

號襄陽教匪餘萬富並非徐添德弟恐徐逆自

知死亡在卽有改換姓名之事臣每於獲賊時

留心查詢各股首逆年貌籍址下落以便擒捕

萬不致有漏網再查魁倫勒保追剿藍號賊匪

已至大寧寺白號餘匪諒必與之合夥因思賊

匪詭譎異常設或另竄一路牽綴我兵亦應趁

其窮蹙剿除淨盡而藍號等股賊匪在前人數

較多又未便舍而不顧擬至前途如果白號餘

匪另竄一路臣卽酌派幹練將領帶領得力官

兵緊跟窮追悉數掃除而臣大隊兵馬卽與魁

倫勒保合剿藍號等股賊衆兩路大兵會辦可

冀迅速集事奏入

上命軍機大臣傳諭德楞泰勒保曰此次德楞泰在

黃鹿鎮朱家坪傅家河等處殲賊三千四百餘名

擒獲投首者共有一千八百餘名此股白號之賊

所剩不過千餘由觀音寺一帶東竄是潼河以西  
已無賊匪辦理誠爲奮勉覽奏深爲欣慰但殺賊  
雖多尙未經擒獲著名首逆又未辦竣一股是以  
未經交部議叙仍著加恩賞給德楞泰白玉喜字  
牌鑲玉火鏢包大小荷包又發去玉翎管水晶鼻  
烟壺扳指套等各五件交德楞泰分賞帶兵出力  
打仗人員用示鼓勵俟川西賊匪全數辦竣再降

恩旨昨據勒保等奏藍號等股折竄仍渡潼河勒  
保督同阿哈保帶兵由西充南部追趕魁倫帶領  
兵勇由西充等處邊界迎擊並顧甘省竄匪已諭  
令勒保以魁倫業經革職拏問此一路帶兵乏人  
另派妥員接手剿辦想德楞泰尙未得信故尙稱  
與魁倫勒保合剿藍號等股之賊現在白號雖餘  
匪無多而藍號黃號青號線字號等股賊匪爲數

不少如此旨未到之先伊二入已將川西各股賊匪剿淨固屬甚善否則德楞泰勒保當察看賊情若川西各股賊匪德楞泰能一手辦竣不致稍延時日勒保自應酌帶官兵仍遵前旨趕赴川北剿辦儀隴太平等處零星賊匪併嚴堵自陝分竄之賊若因川西賊股尙多必須分投剿捕勒保自當與德楞泰迅速剿淨同赴川北至嘉陵江潼河賊

匪往來奔竄正與陝省之賊出入老林情事相等  
現在德楞泰以叅贊實授成都將軍勒保以實授  
提督署理總督通省文武皆其統轄不特剿賊之  
事交伊二人卽一切防堵皆其專責此時賊已竄  
過潼河之東嘉陵江之西若又不能督飭嚴密防  
堵致賊匪仍竄過河西岸或又復竄嘉陵江以  
東惟伊二人是間德楞泰勒保若將川西川北賊

臣悉行辦竣勒保係署四川總督自應在本境實  
力守禦德楞泰旣爲叅贊各路剿賊皆伊分內應  
辦之事竟當帶原有之兵速往陝西幫同額勒登  
保等剿辦卽彼時陝境賊匪辦竣亦應前赴湖北  
協剿必須大功全蔵奏凱旋師來京見朕後方可  
前囬本任至那彥成在甘省剿剩餘匪前已偷渡  
白水江竄近龍安該處爲德楞泰勒保行軍後路

務當嚴飭該員等上緊剿辦此股賊匪不及千人

易於辦理不可再令西竄與藍號等股合夥爲要

同日恒瑞奏言臣前抵鎮安探聞劉添成等股

賊匪在黑洞溝陽山等處屯聚卽帶兵由青銅

關茅坪一路馳抵兩河關前股賊匪已折向西

竄正在督兵進剿據報陽山內尙有一股賊匪

藏匿恐其抄截後路當令總兵柯藩副將李天

林等帶領步兵由小中溪前進

臣

帶領馬隊官

兵由小河口一路前進行抵大中溪山梁賊匪

正在對面山上約六七百人倚恃山高路險搖

旗呐喊

臣

令官兵分路步行攀援而上賊匪卽

潰散奔逃我兵盡力追殺至紅崖河殲賊一百

餘名滚崖跌斃者甚多餘匪亦向前股一路逃

竄生擒查其賢等六名均無要供當卽正法

臣

帶兵又追至趙家灣時已昏黑據北路探報西

來一股賊匪由五郎之四畝地竄至七佛溝竹

山溝一帶焚掠查該處由大山岔可竄商雒之

路甚多

臣卽冒雨趕至鎮安之北黑窑塘地方

探聞該匪又竄至六里溝蔡家莊一帶遂派令

李天林都司海進龍劉應魁等帶領步隊由黑

窑塘翻山向蔡家莊前進

臣帶領侍衛保邦額

爾金泰等馬隊官兵由石嘴子一路前進行至二十餘里之白石溝正遇賊匪向東竄來一見官兵卽奔上山梁抗拒馬步官兵並鄉勇分路仰攻賊匪下壓數次我兵奮力直上鎗箭齊發立斃賊匪十餘名該匪力不能支卽行敗走臣

帶兵追殺三十餘里賊匪拋棄騾馬翻越陡山密林逃竄沿途殲斃二百數十名生擒李維正

等三十七名內有被裹附近民人十八名詢明  
釋放外據李維正等供稱此股賊匪頭目張時

尚有一楊姓不知名字由華陽江口一帶竄來

要從商州往河南去等語餘無要供當卽正法

此次打仗兵勇內間有傷亡俟查明另行報部

奏入

上命軍機大臣傳諭恒瑞曰恒瑞此奏所殲賊匪旣

屬無多聲叙亦未明晰自係接奉朕屢次訓飭諭  
旨心懷惶懼又旬日未經奏報聊以此塞責耳前  
此賊匪在陝境分股竄逸令恒瑞帶兵先行回陝  
專剿陝境賊匪彼時陝省督兵大員惟恒瑞一人  
遇有打仗情形自當專摺馳奏今額勒登保那彥  
成俱在陝省此等尋常打仗之事自當咨明經畧  
等於軍報之便代爲聲叙况恒瑞此次殺賊情形

旣已咨明經畧更不應由六百里自行奏報徒勞  
驛站也嗣後恒瑞帶兵追賊如距經畧軍營遠踰  
千里自當專摺奏報若相距不過數百里祇須咨  
明經畧轉奏不必自行發報至現在賊匪總在老  
林左近奔竄應嚴飭地方文武將沿山各隘口實  
力守禦倘該文武不遵恒瑞調度致有疎虞任賊  
匪在南山老林出入自如恒瑞係本省將軍當查

明疎懈玩悞之員拏送經畧軍營嚴叅治罪其有

防堵出力及打仗奮勇各員亦當報明經畧核辦

同日合布奏言

臣前於三月二十四日通計陝

省各路餉銀每月約需銀五十萬兩奏請撥給

銀二百萬兩其時經畧額勒登保叅贊那彥成

尙未來陝今又添兩大營兵勇一萬有餘計前

二百萬兩足敷四月之用者此時祇敷兩月有

奏三司督飭之臣新卷三  
餘之用若不早爲寬備臨時稍有貽悞於軍務  
殊有關係伏查部撥餉糧總須五十餘日方能  
到陝現在准撥之五十萬兩到陝當在閏四月  
中旬補放前四月餉銀外又復無存昨初二日  
那彥成帶兵來至漢中積算甘省欠發各兵鹽  
菜夫驃等項銀三萬五千餘兩各兵因收拾鞋  
腳紛紛補支應隨後補給當此軍務喫緊之時

臣寧未雨綢繆合無再懇

天恩俯准將前請未發銀一百五十萬兩迅速解陝  
以備買糧放餉之需倘有餘剩據實奏明聽候  
撥用再查軍營糧石向係米麪兼放現屆夏令  
山內霧雨濕蒸麪石易致霉變兵丁往往告支  
大米陝省本非產米之區加以用兵五年常平  
額貯及民間蓋藏動礮採買幾遍若責成本地

州縣採買恐妨民食查湖廣產米較多臣前於

三月內札致湖北鄖陽府知府王正常代辦米

三千石由水路運至興安價值運腳統計每石

合銀二兩有餘較之陝省採買大相懸殊仰懇

勅令湖廣總督姜晟於水路可達興安之州縣中或

倉穀或市米切實籌酌多則二萬石少則一萬

石運至興安以資接濟應需價值運腳銀兩俟

部餉解到卽行委員賈交該督查收臣仍於陝

省再行設法妥辦務使源源滾運勿稍缺乏又

據王文雄具報前因槐樹關一帶地近平原帶

兵前往防堵初三日行至周家坎甫經紮營賊

匪從野猫溝竄出四股越嶺而來又有騎馬賊

目並步賊數百人抄進周家坎後溝攻撲營盤

王文雄令叅將鮑貴德爾青額帶兵分擊嶺西

兩股都司楊光清哈國瓏帶兵迎擊嶺南一股  
該提督自帶都司景坤守備崔雲珠隆阿王吉  
率領礮隊迎擊後溝馬步賊匪傍嶺三股見官  
兵追近一齊奔向後溝該提督率領各隊轟擊  
斃賊數十名騎馬賊目一名生擒吳士舉龍國  
禮等八名賊衆向老黃溝逃竄訊據吳士舉等  
供稱係戴家營要趕張家營合夥臣查此股卽

係由甘折回之賊現屯東面聚有重兵王文雄  
亦隨後追往斷不至竄出山外奏入

上命軍機大臣傳諭長麟台布曰台布自任陝西巡  
撫以來節經降旨將堵剿事宜責成辦理前次川  
匪竄入陝境尚係松筠仕內之事近日甘省賊匪  
闖入陝境台布不能督率防堵而陝境原有之賊  
又未能上緊勦辦專駐漢中惟知以軍餉不敷屢

次墳請且各路奏請餉銀俱經朕酌計多少量爲  
發給亦無奏請若干必須照數撥給之事台布前  
次請餉時當經給銀五十萬兩又續撥銀四十萬  
兩台布此次發摺時雖尙未知有續發之項但據  
伊前奏陝省軍需每月需費銀五十萬兩今計前  
後發去銀九十萬兩已足敷四月閏四月之用今  
伊必欲補足二百萬兩之數是五六月餉銀亦統

算在內朕節次諭令各路領兵大員必須於閏四  
月以前將賊匪趕緊剿盡今台布所請餉銀竟係  
自寬限期安心延宕尤屬非是著傳旨嚴行申飭  
至長麟前次截留川餉六十萬兩彼時曾諭以如  
甘省應用有餘卽當協濟陝省今甘肅已無賊匪  
此項餉銀用過若干餘剩若干長麟卽一時不能  
開出細數其大畧總可核計現在曾否將餘剩銀

兩撥給陝省之處著長麟一併查明具奏又據奏  
王文雄在周家坎地方剿賊情形王文雄係本省  
提督久未見伊奏報打仗殺賊亦不知在何處住  
守此次賊匪從野猫溝分股竄出該提督率領各  
隊官兵施放鎗礮僅斃賊數十名並未痛加殲戮  
而所敘情節又不明晰該提督不過借此一仗塞  
責自此又不可得見矣若似此敷衍搪塞又可安

坐軍營稽延時日尙未除從前疲玩積習昨吉蘭

泰於白水江防堵不力已降旨將伊革職枷號軍

營王文雄寧不知懺懼若不思奮勉出力仍前懈

玩必將伊從重治罪著台布傳知王文雄並遵前

旨速赴經畧軍營聽候派令帶兵打仗勿任株守

一處致有規避至請令湖北採買米石一節湖北

雖產米之區但該省現有軍需應用米石自亦不

少恐未必能兼顧隣省合布何全未計及旣據客  
會姜宸如湖北果能接濟米石固屬甚善否則合  
布當另爲設法辦理朕不能指使也

十七日已亥長麟奏言臣自鞏昌起身先由秦州

行抵徽縣兩當之楊家店太渠鎮等處雖係甘  
省邊界但地方遼闊道路紛歧處處可通並非  
緊要隘口卽每處安兵數千名亦不過虛張聲

勢不能得力臣卽馳抵陝西鳳縣並調集熟

詣將備詳細講諭查陝省賊匪奔竄回甘多由

棧道經過而鳳縣留壩爲棧道中之最要處所

若在棧道內攔截把守俾賊匪無能竄越不惟

甘省之徽縣兩當可資屏障卽棧道一帶亦得

恃以疏通於陝甘均屬有裨其餘如寶雞褒城

沔縣略陽寧羌等處雖亦係陝省地方均應一

體分段安兵防守賊至則率旅迎擊與追兵前  
後夾攻於剿捕大爲得力臣正在籌辦間據額  
勒登保分派提督王文雄總兵索費英阿長春  
札勒杭阿汪啟等交臣酌量布置堵禦臣當卽  
各按地方形勢酌量分撥擬自寶雞縣起至觀  
音堂止交鳳邠道王文湧帶領兵勇防堵又自

防堵又自紅花鋪起至鳳嶺頂止交副都統和  
興額帶兵防堵又自鳳嶺頂起至廟臺子止交  
總兵長春帶兵防堵又自廟臺子起至褒城止  
交總兵汪啟帶兵防堵又自褒城起至寧羌止  
交提督王文雄帶兵防堵以上各處均係陝甘  
交界如此防堵賊匪自不能仍由陝西竄回甘  
省惟自陽平關起至甘省文縣階州一帶能通

川省之路較多並有可由番地竄入甘省者亦不可不設兵嚴防以扼險要

臣

亦經札飭總兵

札勒杭阿在陽平關所屬之白龍江北岸一帶

藩司廣厚在文縣階州一帶擇要防堵並令聯

絡聲勢彼此接應倘有疎虞賊匪於何處竄越

卽將派防何長之領兵大員及將備等一體嚴

參

臣

仍帶兵駐紮鳳縣並不時來往稽查相機

策應總期一省安兵兩省受益陝甘交界勢如

堅壁俾得賊氛早靖謹繪圖貼說開單恭呈

御覽再

臣

自鞏昌至鳳縣各州縣俱有各路留存傷

病兵丁每縣自數十名至數百名不等其餘

臣

未經行走各州縣類此留存者尚不知有凡幾

除通飭查報外此項傷病兵丁若不卽行撤回

原營分別查辦既屬虛糜錢糧且各路軍營正

當堵剿喫緊之時少一兵卽少收一兵之力不

得不作速調撥酌爲抽補又各鎮將所帶兵丁

按冊核稽每營或千餘名至數千名不等一經

札調多係派往別處或護守糧臺或防守城池

均不能適符冊造兵數現在派員分長堵禦最

關緊要亦不能不酌籌添補且臣與額勒登保

那彥成等原議防兵不足添招鄉勇但招募鄉

勇一時不能遽得多人臣已將調赴鞏昌護解

糧餉官兵三百名改作征兵先將臣在途次查

出之傷病兵丁換回原營其餘各營不敷兵數

亦已另調甘涼官兵二千名分派撥補奏入

上命軍機大臣傳諭長麟曰長麟所奏防堵事宜甚  
爲妥協可嘉其名單圖說留存備查但所辦祇係

陝甘交界處所而於陝省可通四川湖北河南等

處未經一律籌及伊係陝甘總督兩省皆其所屬  
自當通盤籌畫不應顧此遺彼況甘省地瘠民貧  
原非賊所覬覦不過因被剿緊急偶一闖入以冀  
少延殘喘今俱竄出甘境諒賊亦不願再行折回  
而四川河南湖北地方係賊匪四年以來往來熟  
徑若陝省官兵分投剿捕賊匪必思分股竄往是  
陝境與川楚豫毗連較甘省隘口更爲緊要長麟

務當按照此次防堵陝甘邊境章程派令文武各員分投防禦以專責成現在陝省剿賊之事係經畧叅贊督辦其糧餉事務專交台布至陝省邊界一切防堵機宜則係長麟分內之事伊現帶兵一千七百餘名不必專駐鳳縣竟當帶兵於陝西各處邊界巡防妥爲布置現在賊匪北面有額勒登保那彥成在彼截剿其附近川省之平利安康紫

陽等處楚省毗連之洵陽白河等處豫省毗連之商州雒南等處均須一律防堵嚴密俱著照甘省之例將何處派委何人防堵開具名單繪圖貼說呈覽至長麟以總督巡查邊隘自當有兵常川隨帶或於途次猝遇賊匪長麟即可帶現有之兵乘機截殺或探知賊匪在何處屯聚亦可飛咨經畧剿辦伊不必親往搜捕惟當將陝省各處卡隘堵

禦嚴密使賊匪無從竄逸卽屬長麟之功將來歲  
事時朕必將伊與經畧叅贊一律加恩共膺懋賞  
倘防堵不嚴致賊匪衝出陝境卡隘闖入川楚河  
南地方則魁倫之覆轍具在長麟不可不倍加謹  
凜也至前此那彥成在甘省剿剩餘匪已竄往籠  
安現有百祥托雲泰在彼剿辦其甘省白水江階  
文一帶長麟現派札勒杭阿廣厚在彼駐守倘此

股賊匪因川西官兵奮力截剿復思折回長麟當  
嚴飭札勒杭阿廣厚督率兵勇實力守禦倘任賊  
匪竄回則惟伊一人是問凜之慎之至所奏經過  
各州縣留存傷病兵丁俱撤回原營一節所辦甚  
是此項傷病兵丁既不能使之打仗殺賊又難以  
分派巡防留於軍營無益長麟分別遣回其空出  
銅銀即可添補新兵自爲得力長麟於巡查邊隘

之後遇此等傷病兵丁均應一律查辦以收實用

同日楊揆奏言查竄渡潼河賊匪擾至三臺中

江一帶督臣魁倫與勒保當由金山驛督兵迎

擊叅贊德楞泰亦由射洪過河星馳追剿一時

大兵會集匪衆情急狂奔分竄金堂遂寧樂至

安岳資陽等處勢較蔓延並有餘匪從金堂之

廣元寺碑出焚掠延及簡州邊界該州毛大瀛

因賊蹤逼近隨帶鄉勇前往堵禦詎行至土橋  
溝地方猝遇馬步賊匪蜂擁而至衆寡不敵致  
被戕害臣聞信深爲憤恨查筭州爲省城東面  
要路設有疎虞所關甚重當於省城派撥官兵  
二百餘名馳赴州城並飭幫辦簡州軍務之州  
判胡廷璿等鼓勵鄉勇併力守禦人心得以稍  
定賊匪卽從廣元寺原路竄逸連日以來分路

偵探據報三臺中江之賊仍復折渡潼河經魁  
倫勒保跟蹤進擊其安岳等處賊匪經德楞泰  
帶兵兜截屢獲勝仗亦由中江一路折竄楊家  
灘躡淺過河距省均已漸遠惟松潘地方毗連  
甘省爲川西龍安屏障連日據松潘同知洪範  
遊擊增順等稟報甘省賊匪闖入南坪竄至東  
勝堡距松潘城十餘里該同知會同營汛將弁

督率兵勇番民於二十四五六等日連次截擊  
斃賊二十餘名及四五十名不等該匪甫經退  
入戈賴番地乃又有一股續至漳臘營所屬曲  
壳地方該處汛廣兵單恐難堵禦請兵援應前  
來臣查此時偷渡潼河賊匪雖經退竄但省城  
存兵除節文撥出外實在無多不能分撥策應  
而龍安地方緊要防範必須嚴密現經魁倫派

委副將托雲泰帶領原防江油彭明之兵勇二  
千餘名前赴龍安協同總兵百祥扼要堵截並  
令將續到之明正革布什咱巴底巴旺綽斯甲  
等處土兵另派叅將張志林一併帶往卽日由  
省分起前進如此分投布置堵禦自能得力至  
省城內外因賊蹤無定人心未免驚惶臣到省  
後復剴切出示曉諭告以各路均有重兵分投

勦辦賊匪斷不敢生心窺伺毋庸紛紛逃避以  
致廢時失業日來避難民人進城較少且有陸  
續搬回復業者民情漸安寧謐奏入

上命軍機大臣傳諭德楞泰勒保曰楊揆奏三臺中  
江之賊折渡潼河經魁倫勒保跟蹤進擊其妄岳  
等處賊匪經德楞泰帶兵兜截屢獲勝仗賊匪由  
楊家灘躡淺過河距省已遠等語業據德楞泰勒

保先後奏報朕已早知惟全寧之廣元寺一帶有  
餘匪肆出焚掠延及簡州邊界知州毛大瀛帶領  
鄉勇前往堵禦在土橋溝地方遇賊戕害一節未  
經德楞泰等奏及此股賊匪據楊揆奏由廣元寺  
原路竄逸後是否歸入白號股內經德楞泰剿殺  
此時潼河以西已無賊匪其簡州餘股諒經剿淨  
著德楞泰等據實覆奏知州毛大瀛因衆寡不敵

中途被戕著各部賜卹至甘省一帶餘匪竄近松  
潘各地方官兵連次截擊該匪退入戈賴番地此  
股大約卽係高二馬五分投闐入現有百祥托雲  
泰帶領兵勇扼要堵截楊揆又將續到土兵另派  
叅將張志林一併帶往協同剿賊所辦尚好賊匪  
退敗番地該處番民不能裹脅且伊等素性猖悍  
自不肯任聰賊匪在彼搶掠德楞泰勒保務當飭

令百祥託雲泰趁賊匪退敗窮蹙之時併力攻擊  
以期一鼓成擒全數殲滅總須將龍安一帶竄匪  
卽在該處上緊剿盡若再令折回甘境卽將百祥  
託雲泰等均各嚴叅治罪至節次降旨諭令德楞  
泰勒保提審魁倫七十五阿迪斯孫熙各案曾否  
審明亦卽據實馳奏

同曰

上命軍機大臣傳諭額勒登保曰前因總兵黃瑞副  
將朱士奉遊擊何天標都司福寧阿四人在滋邱  
大塊口滾河一帶駐守堵禦未能嚴防卡汛以致  
賊匪竄逸經額勒登保永保成德等叅奏降旨革  
職拏問交刑部監禁俟大功告成再降諭旨上年  
刑部查奏在監人犯時朕因永保在滾河疎縱貽  
匪治罪業已加恩釋放遂將該員等分別賞給職

銜發往四川軍營自備資斧聽候差遣該員等俱  
係身獲重譴經朕格外施恩仍令軍營効力自應  
激發天良倍加奮勉著額勒登保查明黃瑞等四  
員自到川陝以後究在何路軍營委用如果認真  
打仗殺賊立功朕尚當酌量加恩倘仍因循怠玩  
不知勉力自贖卽當加倍治罪額勒登保卽確切  
詳查據實具奏